




09972

明孫傳庭撰

剖明站銀斟酌衷濟疏

題爲剖明秦省站銀僅存給驛之數併請斟酌衷濟以裨實用以
佐急需事崇禎十年六月初一日准兵部咨該本部等衙門會題
爲兵餉遵旨熟商事機萬難遲滯等事八月十六日又准兵部咨
該山東巡撫顏繼祖題爲驛遞倒逃不飭緩急脉絡難通等事俱
移咨到臣卷查秦省節裁站銀先該兵部坐派八萬四千一十二
兩零後據各府報到所屬州縣原開撤數止該八萬三千九百五
十二兩零十年分議以三分之二給驛該給驛銀五萬五千九百
六十八兩零該部通查本年銀數除督臣洪承疇題留剿餉銀四
萬兩又漢中新增兵餉銀一萬二千兩止存給驛銀三萬二千一
乾坤正氣集 卷四頁五十五

十二兩零及臣覆查本年銀內又應除前撫臣甘學濶題允俟事
平始撤兵餉銀一萬兩併前州縣所開撤數少銀五十九兩零止
存銀二萬一千九百五十二兩零又漢中新增兵餉銀一萬二千
兩布政司原議以漢中所屬宜南九州縣裁站銀八千三百二十
餘兩兌給及查該府所屬州縣殘破幾半又值異常饑荒此項站
銀萬難催徵臣已行該司另以應存站銀補給則又當除去銀八
千三百二十餘兩止存銀一萬三千六百三十二兩零乃漢中而
外又如鞏昌之階州文縣漳縣成縣兩當西和泰安及西延平慶
鳳興所屬各殘破地方應徵錢糧無論已未題免悉催納不前站
銀豈能獨完故卽督臣原留之四萬尙多借解漢中原留之一萬
三千亦臣以屯餉借給見今嚴催該司抵補該司若不能措又安
所得一萬三千六百三十二兩給驛之銀也則此給驛之銀自應



從十一年始及查十一年站銀照該部原議以二分給驛該銀五萬五千九百六十八兩零以一分報部該銀二萬七千九百八十四兩零其報部銀內又應除寇平始撤兵餉銀一萬兩漢中新兵銀一萬二千兩尙該銀五千九百八十四兩零乃十一年之民力豈遽加於十年卽給驛之二分與事平始撤及漢中新留之兵餉亦斷不能盡完無欠又宐有贏餘可以報部乎此臣所謂秦中站銀僅存給驛之數其報部之一分自應仰懇天恩勅該部卽爲除免至於給驛之數無論完多完少俱應給驛乃臣又請爲之斟酌哀濟者查兵部原議陝西用兵所在驛遞數倍艱難徑免三分之一仍給各驛是該部原因秦之用兵而念其艱難因秦之艱難而始爲給驛也乃秦之驛遞固艱難而驛遞之艱難實不一且秦之艱難又不盡在驛遞而更有甚於驛遞者臣身任秦事第欲使此

乾坤正氣集

卷四十五

二

徑免之二分實足以濟秦之艱難以仰副聖明之德意以不虛兵部爲秦請命之苦心則於給驛之中旣不容混施於給驛之外又不得不兼顧矣查得秦中驛遞向因各衙門差遣繁多夫馬苦累臣於入關之初設法嚴禁置立號票非係傳報緊急軍情部解京邊錢糧與夫取辦軍器等項例應用勘合火牌者不得用驛遞一夫一馬於是濫差盡杜應付遂減臣又查近省各州縣驛遞如咸甯長安臨潼渭南華州華陰潼關高陵富平三原岐山鳳翔等處驛遞向皆僉募馬戶多有市棍包攬借口衝繁攀害里甲每馬里甲帮貼銀八九十兩甚有百五十兩二百兩者臣盡革市棍仍訪其奸弊之甚者嚴拏勘問時尙未有兵部官養馬匹雖是美意實非良法之議臣行令各該州縣以原額站銀官買馬騾於公所攢槽餵養走遞其馬騾間有倒斃仍詳申臣衙門批動站銀買補於

官無累於民無擾卽不敢保後來亦遵無斁而見今行已逾年頗有成效故臣接部咨之後於未經官養者固行令照舊於已經官養者亦未敢更改節據咸宜長安岐山潼關等處開報該驛站銀自官養以來各有省剩不等今如概行給驛欲給民則民未應差欲給官則見在已有省剩此項之給不幾付之虛擲乎是此十餘處官養之驛遞固可以無給矣此十餘處乃本省有數衝繁之地經臣釐飭調停既支掙容易其諸次衝而少僻者自可類推卽其中道路遠近不一原額多寡相懸亦可以無概給矣又有向來雖稱衝繁近因前路梗阻差使罕至如鳳翔之寶雞西安之武功興平等處走遞旣減卽宜量示優恤亦可以無全給矣臣何敢以朝廷軫恤艱難之賜而漫爲市恩也至有昔稱簡僻今較衝繁如沔縣畧陽徽州秦州清水隴州汧陽等處自棧道梗阻漢興一帶差

使俱改繇此路其臣禁裁僞濫之所減亦不勝此道路歸併之所遵自應遵照部議以三分之二徑給又有殘破驛遞無論夫馬全無卽驛舍民居皆被火燬如草涼三岔松林安山武關青橋馬道關山等處俱宜另議修復工費不貲雖儘此原給之二分或再於二分之外更加一二倍猶不能濟事故前撫臣練國事曾請有修復站銀二萬竟未敢輕舉昨臣已借動買馬今剿威大振賊滅有期凡各例廢驛遞皆應次第整理似不得舍此項而別請經費自應那各驛可以無給與可以無概給及可以無全給之銀以充修復之用故敢以斟酌哀濟仰請明旨乃秦之艱難更有不在驛遞而甚於驛遞者無如防餉是矣查得韓城郃陽馬蘭潼關等處防兵先年題准每年支用兵荒銀一萬九千五百六十兩七錢商稅銀二萬九百九十四兩初時計口授食無虞虧缺嗣因寇勢披猖

兵數日增餉額不敷俱於題留剿餉內奏支至崇禎八年部議將兵荒銀改充韓藩宗祿其應支防餉於本省軍餉內照兵荒銀數撥抵其防餉不敷者亦應仍以剿餉奏支乃本年因調到剿兵衆多題留剿餉且不能支剿兵之用故不能奏支防兵節經前撫臣李喬甘學濶批行布政司措給除正項外剿兵及防兵共長支過軍餉銀五萬四千五百六十六兩零曾經前撫臣甘學濶題請開銷部議以未題先支未准仍將前長支銀令每年設補一萬九千餘兩卽准作撥抵兵荒之數自九年起防餉益無著落今查九年防餉支過銀三萬六千九百餘兩原額商稅銀止收完八千六百有奇十年防餉支過銀三萬六千一百餘兩原額商稅銀止收完一萬一千八百有奇其餘不敷之數皆於司庫那借奏支以至於今那無可那借無可借除臣於稍緩處節次裁去兵約一百七十

乾坤正氣集

卷四十五

四

餘名馬約三十餘匹而實支月餉歲費尙約需三萬三千餘兩此在戶部自知爲應支之數且該部旣以原支之兵荒銀撥抵韓藩宗祿題明以軍餉撥補乃因前撫臣於額外各有長支遂恡惜刑予自臣接管併額內應支之一萬九千餘兩亦不准支故臣不得不行該司委曲借給今所借日多該司日申詳促臣請補臣以時值空匱聖明宵旰方殷遠巡不敢賣陳頃臣清有屯課銀兩除支三衛官俸軍糧解給班價及修關軍丁鹽菜與夫造器充賞之外尙可奏補此項但戶部因臣見抽屯課已將應給臣剿餉扣短四萬六千餘兩又臣自崇禎十年該部撥臣剿餉一十八萬之外以後卽臣兵不能遽撤其所需之餉臣矢不取給於該部臣已於清屯事竣疏中明白入告矣是臣所期以屯課濟朝廷之用者固不能一樹幾剝以應各項之需也幸此裁站銀兩兵部已題允給驛

台無容臣通融支用除應給之驛遞與應修理之驛遞臣酌量徑給及通融動用外餘有若干卽奏給防兵餉銀總此給秦之物一哀濟間而於彼既不致虛糜於此亦不患匱乏計蓋無便於此者至給過銀數布政司於年終分析造冊報部銷算其戶部抵過宗祿原撥防餉兵荒銀一萬九千餘兩止照原數以軍餉撥臣抵補其九年十年用過防餉除每年應支軍餉一萬九千餘兩併稅銀外九年長支過銀八千六百餘兩十年長支過銀四千七百餘兩令該司照數補完其前撫臣八年長支銀五萬四千餘兩候事平水陸路通商後稅銀足額陸續扣還庶透支永杜而正項亦永清矣再照站銀雖屬在兵部防餉雖屬在戶部然兩部協心體國豈分彼此且此銀業已給秦矣又用以餉兵兵部豈有靳焉至該部原議以十年分站銀給驛三分之一未及十年以後乃秦彫剋至

乾坤正氣集

卷四十九

五

極非微皇上厚澤深仁徐爲培養元氣何能遽復則皇上之所以濡沫而噢咻之者豈忍自十年遂已卽臣之所以仰懇再造者亦非直以秦十年之自處其窘未獲實露浩蕩輒敢喋喋也統祈勅部施行爲此謹題崇禎十一年二月初二日具題三月初三日奉旨該部知道

報流寇自蜀返秦疏

題爲微臣遵旨東截剿兵邊賊北返謹馳奏上聞併報微臣回省調度相機防擊以竭臣愚事臣遵奉明旨親督官兵在於商雒斷截已經具奏併節具塘報外今於二月十一日據西慶平鳳監軍道僉事張京塘報同日又准按臣謝秉謙手本到臣案照先於二月初五日據漢羌營遊擊韓進忠塘報同日又據分巡關南道劉宇揚塘報各到臣今據前因該臣看得自關過等賊入蜀而秦之

西南半壁亦併無大寇之跡矣督臣洪承疇復提固原總兵左光先臨洮總兵曹變蛟及副將馬科賀人龍趙光遠等勁兵盈萬入蜀遠討而又馳調延鎮總兵王洪及宣帥祖大弼之兵厚集於漢畧徽秦之間首尾聯絡以防賊之奔逸而備我之堵擊臣謂盡賊在此一舉矣故臣奉聖明斷截商雒之責成臣亦不敢望督臣分一鎮之兵以佐臣之單弱卽樞臣楊嗣昌低回籌度亦似穆然於臣力之難支而臣迄不敢稍萌諉卸且有督臣不能忍然東返之奏以決我兵入蜀之行臣之區區惟日望大兵滅賊於蜀使一騎不還則蜀之危解而秦西南之患亦可以永絕矣縱臣汛守之地或以力綿價悞致干斧鉞臣甘之已不謂自臣入山豫楚之寇反徘徊未敢突犯商雒而入蜀之寇忽又盡報還秦老營已劄西禮塘馬已至秦州矣查各賊自至蜀中三閱月皆盤旋於川西一帶

乾坤正氣集

卷四十五

六

在白水江西故所失城池亦俱係江西地方川西西阻羌番東南俱阻大江川兵亦盡聚於東南故賊不能東出夔門南走敘瀘設使我兵卽從川西進發川兵扼堵於前秦兵馳擊於後賊逃死無路勢成釜魚不謂兵從川北南下賊遂從川西乘罅而北矣此實秦之劫運未已臣之蹇劣應值此厄夫復何言據報左曹兩帥似皆在賊後王帥已赴漢中尙祖帥又不能拒堵於西禮則西鳳平慶勢復岌岌臣見防商雒豫楚諸賊如八大王等股猶鷲伏於穀城而葉縣舞陽亦報有大寇擾掠瓦背餘孽復出於嵩永之間臣原不敢遽離商雒第西鳳內地尤宜亟顧查原任總兵張天禮領有馬兵一百餘名步兵三百餘名先奉督臣檄駐咸陽臣已移文促令馳赴鳳翔防禦然爲力幾何恐不足恃臣不得不馳還省城適中調度如西賊突犯鳳寶恐商雒駐防官兵遠調不及亦應預

啟省以備發剿俟臣至省酌量緩急調取謹先據報奏聞伏乞
聖明垂鑒至臣母老子獨迎養則水土不宜送還則倚閭難養臣
方欲俟大剿期畢陳乞終養而今不敢請矣賊旣返秦此臣報君
之日非臣報母之日臣所練就兵將儘堪一試臣惟有捐糜頂踵
矢不與賊俱生以盡臣戮力封疆之義倘徼天之倖稍有寸效可
以稱塞萬一臣乃敢披瀝血誠萬懇聖恩以還臣身於臣母俾臣
母未盡之餘年得以少延臣今年方四十有六竭萬死以報聖明
固有日也臣無任悚息待命之至臣草疏甫畢據商雒道副使邊
崙塘報本月十二日酉時據本道原差往內鄉探賊舍役趙自旭
等報稱年前剋了鄧州裹去難民一百有餘蒙鄖縣給票各回本
地從穀城來正月三十日到州州官審問難民說八大王長判子
二營安穀城縣內一半爲民一半跟隨鄖院招成兵馬他俱要剿

乾坤正氣集

卷四百九十五

七

賊又有鎮平縣差人在內鄉縣探報賊情二月初二日據報縣官
說四大營賊闖塌天老回塌地王興世王俱在裕州唐縣泌陽
縣後有河南撫按兩院統領祖左二將官兵馬俱在裕州駐劄跟
剿其四營賊並不殺人放火俱在裕州討招安不知真假等情據
此則豫楚賊情俱緩臣斷截商雒之兵益應預發還省無容再計
爲此謹題崇禎十一年二月十三日具題三月初三日奉旨據奏
蜀賊返秦孫傳庭馳還適中調度併駐防商雒官兵檄令赴省備
剿知道了督兵必繇川北始達川西這所奏卽從川西進發取道
何路還著查明具奏

酌議量蠲民運錢糧疏

題爲蠲緩已奉明綸查酌萬難需侍事崇禎十一年二月初三日
據陝西布政司呈詳到臣該臣看得秦中被寇殘破州縣及兵荒

最甚地方崇禎六七八年存留課程等項錢糧凡拖欠在民者業荷聖恩蠲免矣至於民運一項係供延益甘固四鎮軍需盡蠲則邊餉虧缺可慮不蠲則災黎輸納不前另議抵補則公私匱竭從何取辦臣仰遵明旨從長確議除臨鞏二府屬州縣九年以前起存錢糧已經前按臣黃希憲具題分別蠲免又漢陰石泉二縣九年以前起存錢糧已經按臣謝秉謙具題全蠲俱經部覆奉有諭旨又漢中府屬九州縣十年以前各項錢糧昨臣已疏請全蠲茲不再贅今復將其餘州縣酌被災之重輕議蠲徵之等差如西安府屬山陽鎮安同官永壽澄城藍田商州商南雒南九州縣鳳翔府屬之隴州麟遊扶風汧陽四州縣與平涼府屬之涇崇等十州縣慶陽府屬之宜安等五州縣延安府屬之鄜膚等十九州縣并興安州及所屬白河洵陽平利紫陽四縣應將所欠六七八年民

乾坤正氣集

卷四十五

八

運錢糧全蠲如鳳翔府屬之鳳翔寶雞岐山郿縣四縣應將所欠民運錢糧在六七兩年者全蠲在八年者量蠲五分帶徵五分如西安府屬之咸陽耀州韓城邠州長武三水淳化乾州白水富平華州華陰郃陽蒲城十四州縣應將所欠六七八年民運錢糧量蠲五分帶徵五分如西安府屬之鄠縣盩厔長安三原臨潼同州六州縣應將所欠六七八年民運錢糧量蠲二分帶徵八分總之原議蠲之數原皆不能徵者也祇緣民力已殫在議徵之數亦未始非可蠲者也祇緣軍需難缺正該司所謂萬不得已之情無可奈何之勢也除將蠲免過存留課程等銀遵旨造冊報部外臣謹會同按臣謝秉謙周一敬合詞具題伏乞勅部覆議施行爲此謹題崇禎十一年三月初六日具題四月初一日奉旨該部知道

恭報東西寇警併陳剿禦情形疏

題爲恭報東西寇警併陳剿禦情形仰祈聖鑒事節據分巡關西
分守河西守巡隴右并固原洮岷商雒及分巡關內臨鞏漢興監
軍各道所報東西賊情臣已塘報閣部訖三月初三日據潼關道
按察司丁啟睿塘報初四日又據邠州知州鄧元復塘報又據西
安府同知管三水縣事孔宏燮塘報同日又據西慶平鳳監軍道
僉事張京塘報各到臣該臣看得自入蜀大寇復返階文臣慮其
飽而愈橫且有左曹等兵逐之於後恐賊卽出我不意疾走西鳳
故臣從商雒還省內顧然猶不敢遽撤商雒斷截之兵者誠以屢
旨責成甚嚴又臣荒山久戍之苦辛不忍自棄耳及嵩盧之小醜
宵奔平固之警聞復迫臣方欲移緩就急儘臣所有之兵悉索西
援乃河南按臣忽有傳帖馳約夾剿情事甚急且有一刻千金之
囑而靈陝之晉兵又因期畢渡河臣何敢以西援廢東顧故臣先

乾坤正氣集

卷四百九十五

九

將盛畧之兵調至臨潼又將李國政之兵調至省城其趙大允及
王萬策之兵亦擬併調出山發之使西而今不敢盡調矣乃六隊
大天王混天王諸賊已從平固分道而來左曹之兵俱落賊後又
兩帥相倚仍與闖過相持不能分圖此賊祖王之兵雖在賊前或
緣道左相失今亦俱落賊後遂聽其爰爰東去據各處塘報賊
分合無常飄忽不定衆寡之勢似猶未確及得監軍道張京之報
該道哨探最真此賊儘非小弱督臣洪承疇已摘發一旅付該道
分提尾逐轉瞬之間此賊便當越平慶突邠乾瞰淳三矣臣知夕
摩厲與賊一決正在此候其又何敢藉口於商雒之斷截奉有畫
一之責成而遂任此賊鴟張內地剽掠惟意乎第臣之兵合之差
堪自強分之未免見弱然臣不敢以弱自諉也臣且將總兵張天
禮之兵移令與該道合力逼賊又嚴檄該道謂賊在東而兵在

且賊塘已至鎮寧該道惟逐賊使東勿縱賊復西卽該道之功若夫迎頭堵擊設奇殲剿臣當惟力是視成敗利鈍悉臣任之臣今將李國政王根子張文耀之兵檄繇耀淳邗乾之間隨西賊所向奮力迎擊而發參將解文英之兵與王萬策兵分駐商雒偵探東賊以應河南之夾剿潼關有韓邨參將王永祥兵併關兵馬步千名堪與王萬策解文英兵犄角聲援其趙大允兵暫更回省併副將盛畧兵中軍鄭嘉棟新兵亦俱屯駐近省聽臣酌量東西緩急檄發策應此臣目前調度之大畧也爲此謹題崇禎十一年三月初六日具題四月初一日奉旨兵部知道

復級謝恩疏

奏爲恭謝天恩事崇禎十一年三月初六日准吏部咨該臣奏爲微臣清屯充餉雖効微勞過蒙異數殊恩萬難祇受謹披瀝控辭

乾坤正氣集

卷四百九十五

十

仰祈聖鑒事奉聖旨孫傳庭清屯著勞敘賚已有成命不必辭該部知道欽此欽遵抄出到部移咨前來同日又准吏部咨爲微臣清屯事竣三秦永利已興謹彙報前後清出實在兵糧數目等事一疏該戶部覆題奉旨李虞夔加一級賈鶴年等俱紀錄孫傳庭清屯充餉勞怨不辭著加一級仍賞銀三十兩紵絲二表裏用昭激勸今後各撫務以秦撫真心實事爲法不得自狃匱詘徒煩仰請欽此該吏部覆題查得見任巡撫陝西等處地方贊理軍務都察院右僉都御史加從三品服俸降二級戴罪孫傳庭加一級應加從三品查部院無從三品職級合無將本官原降二級俯准開復仍免戴罪等因奉聖旨是欽此欽遵移咨到臣卷查先該兵部數敘擒闖勦次奉聖旨洪承疇孫傳庭著各加一級仍俟事平彙敘欽此該吏部覆題查得見任總督陝西三邊兼攝總督河南山

西陲西湖廣保定等處軍務兼糧餉兵部尚書兼都察院右副都御史洪承疇係正二品今加一級該從一品合加官銜伏候聖裁見任巡撫陝西等處他方贊理軍務都察院右僉都御史孫傳庭係正四品加一級該從三品查部院無從三品職銜合無擬加從三品服俸等因奉聖旨洪承疇著加太子太保孫傳庭加從三品服俸欽此臣連疏控辭兩奉敕陞已有成命著卽祇受不必遜辭之旨臣具疏謝恩祇受訖嗣因大兵入漢剿賊賊攻陷石漢按臣謝秉謙具題吏部覆奉聖旨洪承疇孫傳庭著各降二級照舊戴罪剿賊自贖欽此欽遵移咨到臣欽遵在卷今准前因伏念臣有懷報主無術匡時頃以力尋濟否之方輒爾勉爲清屯之役祇甘勞怨敢冀寵榮乃疊荷褒嘉更渥邀敘資雖勞微賞重式蛙市駿朝廷自有機權然器小易盈濡鵠續貂臣子宜揆涯量用是特求

乾坤正氣集

卷四十五

十一

辭免以憊患忱何期未賜矜原更叨溫汗幸藉司衡之裁酌適協引分之籲陳卽臣秩之原無可加知君恩之益有未極矧戴華裳而道斧鉞徵倖已多又曳文綺而橐精鏐冒叨復甚臣惟有追前愆以省過矢竭捐糜勵後效以酬恩永圖稱塞而已臣無任瞻依感戴激切屏營之至爲此謹奏謝以聞崇禎十一年三月二十五日具奏四月二十九日奉旨該部知道

題潼關設險合兵疏

題爲設險乃能據險合兵卽以增兵謹請留用工軍改移營將以固巖關以明責成事崇禎十一年二月初八日據潼關兵備道按察使丁啟睿呈詳到臣卷查十年十一月三十日准兵部咨該臣奏爲遵旨查奏事該本部覆題十月三十日奉旨李煜然專轄地方任賊關入漫無扼禦豈得以不繇潼關輒議調用著革職賊出

入既不必繇關以後堵禦作何責成該督撫詳查確議具奏不得
朦溷欽此欽遵抄出到部移咨前來已經備行潼關道查議去後
十二月十二日據該道呈詳隨卽移咨督臣會議去後今准咨復
前來該臣看得潼關夙稱天險比來賊騎衝突惟意豈河山形勝
忽異則以控扼需人今不古若耳查關城之南有平野四十里直
抵南山之麓爲南原與豫之閩鄉壤地相錯寥濶漫衍實賊往來
孔道賊入秦出豫率從此奔竄此外依山傍壑有徑可行者謂之
峪豫秦處處爲鄰而處處皆山處處皆峪然繇豫入秦之峪其通
商雜道地方者紛紜不可指數其通潼關道地方者則惟蔥峪甃
峪蒲峪潼峪蒿岔五峪通華陰峒峪喬峪構峪石堤四峪通華州
葑使南原四十里之罅漏一塞則陰華之九峪俱有一夫當關之
勢而關門一帶節節皆成難踰之險矣臣又查南原四十里俱下

乾坤正氣集

卷四百九十五

七

臨禁溝深峻可憑故臣與潼關道臣丁啟睿籌畫經年議於原上
建三堡堡與堡相距約十里各屯步兵二百名扼守聲援又置一
十五墩墩與墩相距不三里各宿火器手二十名俾憑高擊打火
砲之力彼此相及其堡若墩俱傍禁溝築建又將溝旁樵牧小徑
剗削壁立但堡墩先完各依前數置兵於內賊卽有十萬之衆必
不敢逼近溝下此臣所謂設險乃能據險也今墩已修完八座臣
又發屯課三百兩檄該道嚴督夫役併工修築刻日可以通完惟
是三堡之規工費頗多該臣議將潼關衛本年應撥延宜鄜州班
軍一千二百一十八名暫留一年以自爲計在延宜不過免催一
年逋欠之班價而可使全省咽喉之地金湯永固想延宜共濟有
心或亦必許留不靳也至設險旣周固可無需多兵然此堡兵六
百墩兵三百在不可少除墩兵卽以衛卒撥用其堡兵六百專令

伏險邀擊非邊丁不可查關門有現在漢土丁僅五百名即盡充
堡兵尚少一百名又自堡兵而外如別無一兵非所以建威消萌
故臣欲共設兵一千二百名原不爲多然當此單虛匱竭之時縱
兵可另募餉從何出臣查先年因寇起延北設有韓郃營兵除先
撥關門三百卽在今五百之內又因防餉不敷陸續逃亡調用者
未行招補今止存三百二十名又馬蘭防兵亦因備禦延寇而設
俱係邊丁除逃亡調用外尙存一百名今延北宣息兩地又俱非
重地臣於馬蘭且另撥有屯兵往守此兩地之兵俱應歸併關門
合之關門漢土丁共九百二十名再於潼關衛兵內撥砲手二百
八十名共足一千二百名以馬兵六百當關步兵六百居堡俱付
王永祥統領以其營改爲潼關營以該將改爲潼關營參將則不
煩增兵而關門自不患兵寡矣此臣所謂合兵卽以增兵也查王

乾坤正氣集

卷四覽五

三

永祥原銜係以遊擊署參將該將資俸已深勤能練達屢有戰功
應改爲實授參將則該將感恩圖報凡可爲巖關効竭者當益無
不殫之力矣夫如是則天險以人謀增勝非徒有山河百二之名
兵威以地利益雄居然成虎豹當關之勢自今而後賊乃不敢正
視關門倘或更有窺逞該道將自當併力堵禦務令匹馬不得闌
入脫致疎虞該道將不能辭其責然或賊從內出則難概爲苛求
蓋我據溝設險險俱在外不在內也凡內出之賊必先據南原非
墩堡所能禦且賊衆動稱數萬亦非墩堡之軍所能格又各峪之
徑自內扼堵固易爲力若賊原在內我卽有百十戍守之卒站立
且難尙望其扼堵乎若該道將能出奇擊勦卽當據功論敘至道
臣丁啟睿締造籌畫爲重地永遠計尤備極苦心應俟堡工通完
查數優敘至於商雒賊入之路不啻萬徑千蹊實窮於扼堵無方

則所以責成商雒道者惟有預偵早報嚴守城池以待援兵之至而已臣謹會同督臣洪承疇合詞具題伏乞垂鑒爲此謹題崇禎十一年三月二十九日奉旨該部看議具奏

報合水捷功疏

題爲官兵出奇扼要恭報捷音事臣提標下副將王根子等兵馳赴慶陽征剿六隊等賊先檄監軍僉事張京督遊擊崔重亨吳國偉兵從西緊躡賊後又檄監軍僉事王文清督副將盛畧趙大允兵赴中郎埋伏於前檄定邊副將柳汝樵從北面堵截夾剿三月十七日夜臣抵慶陽據報賊老營奔東北水飯臺吳旗營賊撥精兵向在馬嶺潘家寺臣傳令各兵秣馬的於十九日平明進兵十八日據副使鞠思讓報稱監軍道督崔重亨吳國偉二將尙在萬安監是夜臣率各兵肅隊前往約四鼓將近阜城又據報賊營已

乾坤正氣集

卷四十九

五

移閭家嶺臣恐我兵疲勞勢難追擊又以崔吳二將尙在萬安監距曲子驛二百餘里不能遽至因將兵馬撤伏阜城歇息擬俟二十日剿十九日卯時據曲子驛稟報崔吳二將兵馬於十八日二鼓抵曲子驛十九日進兵臣卽督副將王根子參將鄭嘉棟遊擊李國政等兵馳赴夾擊我兵窮追六十里賊奔東北訖臣將步兵屯阜城二十日帶馬兵至慶陽探賊所向另圖進剿二十二日據監軍張京塘報本職奉總督軍門牌委監遊擊崔重亨吳國偉統領馬步兵一千三百餘員名於二月二十六日自禮縣起程赴平回追剿六隊等賊三月十二日師次鎮原嚴督崔吳二將兵馬扼險設伏驅賊東奔毋使西折以便大兵就進夾剿職思賊在曲子驛若我兵直抵府城則賊必西奔遂於十四日改繇萬安監接據慶陽府塘報內稱賊在環縣地方曲子驛馬嶺河攻堡搶糧久

屯不去等情職思該監離賊營尙二百餘里路險溝深不宜趨利遂與二將等商議令於十八日五鼓起行直抵賊營十九日平明交鋒賊精健五六百騎倚險迎敵鏖戰多時賊且戰且卻誘我深入官兵已追殺三十餘里恐墮賊計乃始收營當陣斬賊首級奪獲大旗盛甲馬匹賊本日卽東奔柔遠川等情臣度賊雖東遁東邊一帶人煙斷絕無可搶掠恐賊乘我官兵在西或南奔合水出犯三淳遂一面發參將鄭嘉棟統兵趨赴華池翼樂堵截一面發副將王根子遊擊李國政都司張文耀各統兵馳赴合水擊剿二十四日至合水青岡原遇賊大戰賊敗東奔臣一面檄令副將盛畧趙大允兵迎頭截殺一面檄李國政王根子等兵尾賊緊促窮追二十六日忽報過天星混天星等賊自階文透出成徽突至寶雞臣聞警卽調李國政王根子鄭嘉棟俱撤兵馳赴鳳寶截剿又

乾坤正氣集

卷四十五

五

調參將解文英遊擊王萬策俱赴臣軍協勦其六隊之賊仍檄崔吳二將兵從西尾追又檄盛趙二將兵從東堵禦臣於二十七日自慶陽蘇華池先統鄭嘉棟兵南發復檄李國政王根子星馳赴援臣已塘報閣部併合水捷功附報大畧訖本日據報三月十九日追賊遠遁死賊忽東忽西各處竄奔二十四日巳時官兵至合水縣隨據鄉民報稱賊從羊圈溝蜂擁前來前隊已過黃家崖窰離縣城二十餘里馬兵從旁抄撲三路齊攻死賊大潰各路官兵追殺二十餘里至青岡原龍王廟當斬獲賊級生擒活賊奪獲盛甲戰馬隨有賊數千接戰迭相迎殺自午至酉我兵奮勇戰經百合羣賊調聚各山精悍設伏誘敵我兵鼓勇直前當陣砍殺馬上精賊數人旗幟盛甲弓刀馬匹全獲死賊披靡我兵乘勝又追十餘里漢土兵丁追砍射賊落馬者數十當陣斬獲首級無算前後

一日五陣追殺三十餘里我兵全勝收兵回營於戌時回至合水縣查得都司孫鑑等斬獲老營隊賊混名三隻手等首級六顆新營副將王根子標下守備張大成斬獲小頭目飛山龍首級一顆中哨都司趙祥斬獲上天虎首級一顆千把總王嘉棟等一十九員各斬獲強壯賊首級一顆土丁毛哥則等斬獲老營隊黑虎賊混世龍小天神二天王首級各一顆紅藍旗材官土丁明罕等一十五名各斬獲強壯賊首級一顆新營副將王根子標下都司趙祥等奪獲大天王長子雷神保年十二歲次子三家保年五歲奪獲賊婦盧氏常氏劉氏張氏遊擊李國政標下守備李文奎等斬獲強壯賊首級八顆把總吳養純等斬獲管隊賊飛龍賊頭鑽天龍老夜不收張飛等首級各一顆隨征都司守備路吟囉等二十一員各斬強壯賊級一顆監營遊擊張承烈標下親丁張應太等

乾坤正氣集

卷四百九十五

六

五名各斬強壯賊級一顆都司張文耀等斬獲上天虎不著地小鴉子首級各一顆周永圖等一十八名各斬獲強壯賊首級一顆材官范廣等擒獲活賊三名李敬等奪獲賊婦陳氏王氏以上各營官兵斬獲有名賊頭首級併強壯精賊首級共一百五顆生擒活賊三名賊婦六口賊子二名俱押送合水縣查驗明確取有印結在卷所獲鐵盔甲二十二頂副棉盔甲六十一頂副弓箭刀共四百二十件驗明仍付原獲兵丁收執各營共獲馬騾三百餘匹分別給賞有功員役各等情到臣三十日臣行次邠州據報過混等賊已過興咸臣先因標下營畫司務陳繼泰統兵漢南疏棧報歸卽檄本官統民兵二千名赴口子鎮扼防六隊等賊出犯涇三嗣因各賊殺敗東道臣復檄本官統兵赴涇河上下渡口堵截混過各賊去後續據各縣報賊已至涇三時王根子兵次政平李國

政兵次宜州臣令鄭嘉棟之兵改繇淳化截徑於四月初一日先赴三原臣催王根子兵亦繇淳化於初四日抵三原據陳繼泰塘報三月二十九日丑時探至南原有賊騎二百餘已到涇陽縣之南渡職親督官兵截之於信和堡與賊相遇當陣斬獲強壯首級七顆活擒一名奪獲婦女二口馬騾驢一十六匹頭盛甲一副弓刀十三件箭刀銃砲所傷無數等因又據各縣報賊從高富東奔臣先於沿途一面檄催參將解文英遊擊王萬策從商雒作速前來一面調原任參將朱國棟田時升統在省銃砲手一千五百名赴軍前俟各兵齊集卽隨賊所向合圖大剿該臣看得六隊大天王混天王爭管王等賊與闖將過天星混天星等賊自秦入蜀飽掠同歸而六隊自負精強惡爲闖將所軋因先度陽平走畧陽歷禮伏越平固直抵慶陽將爲久屯之計以其地有糧可因且險足

乾坤正氣集

卷四百九十五

七

踞也臣自聞賊東犯卽申約道將分汛責成誓圖剿滅比東西兩川之聚結報探稍真臣一面檄監軍張京督遊擊崔重亨吳國偉兵又擇總兵張天禮所部精銳益之俾從鎮原一帶張勢東逐一面檄監軍王文清統副將盛畧趙大允兵俾從中宜一帶鼓銳西截又一面檄定邊營副將柳汝樵率該營精銳塞其北通之路臣親督中軍鄭嘉棟遊擊李國政原任副將王根子都司張文耀等兵出淳三窺眞徑撲慶陽迎擊臣於十七日夜四鼓率各兵入慶陽府城於十八日傍晚發兵約十九日早可至賊所剿殺及行逾夜半將近阜城而守弁郝光顯報稱賊營又北徙三十里臣念各兵遠涉已勞若趨利於百三十里外恐犯兵家之忌又崔吳兩兵不能齊集因撤各兵暫慰阜城不意崔吳二遊擊是日於二百里馳至突逼賊壘遂與接戰臣迅發各兵應援乃兵未至而賊已望

塵奔矣僅二遊擊斬賊二十七級稍挫其鋒猶未大創賊奔之後
據險不出累據偵役報賊精兵猶出沒西川而老營則已密移東
川臣慮賊欲賺我兵於西卻繇東川疾走三淳乘隙剽掠臣遂檄
監軍道張京仍督崔吳厲兵以誌西邊之防而以鄭嘉棟兵發華
池以李國政王根子兵發合水偵賊南向卽縱兵截擊比李國政
等兵方至合水忽報賊果結隊而南矣兩將能謀善戰決機迅敏
當卽申嚴軍令奮臂先登而都司張文耀素懷忠義復經樞部敘
陞期以死報與兩將聯鑣同進又各率所畜土降丁健驍勇絕倫
故能迎頭苦戰冒險窮追殲對壘之寇克執渠魁之孽子雖功級
僅百餘然皆馬上精賊較襲零尾後掩殺被據脅從豈但一可當
十至所獲二孽俱皆賊首大天王之愛子乃悉爲我俘則我師之
勇奮與賊衆之狼狽固可知已夫賊當掠蜀新歸兇鋒烈焰不可
乾坤正氣集

卷四百九十五

六

嚮邇諸將之捷使我氣振而賊魄奪卽內地風鶴之人心亦有所
恃以無恐其有造於風雨漂搖之危秦殊非淺鮮衡功論敘似不
宜較量於功級之多寡矣王根子善用土丁此戰尤最得土丁之
力所擒大天王二子皆其部下官兵厥功居首本官曾經題參擬
戍尙未部覆後以擒闖功奉旨另案酌議今應行免議量與瀚除
李國政瀝血誓衆殫力殫心且此戰之分合有法始終不懈實賴
有國政爲之指麾相應優敘張文耀率偏師一枝能與二將分路
齊驅勇氣無前亦應並敘其原獲雷神保之趙祥胡椒大王之孫
成才與督陣當先衝鋒斬級之兵部差官施應堂都司守備孫鑑
郭鳴鳳崔應舉任國柱王加福等各營守備千把總張大成李文
奎李秀張鵬翼李國愛苗大勝劉友元賀登第吳養純范廣許成
光等漢土兵丁毛哥則卜桑顧高遷孫世才卜卜戶白光明等亦

應併敘至遊擊崔重亨吳國偉星馳赴敵突爾一戰實爲各將之前驅中軍鄭嘉棟都司張一貴與隨征都司李世春派伏南路雖未與戰勞不可泯亦應紀錄監軍道臣張京度賊去向如在目中而往來邀擊宵征露處備極勞苦併應紀錄示勸定邊副將柳汝棻會經檄調未到或因道梗至都司郝光顯始雖探賊未確繼能親尾賊後得賊情形不時馳報俱應免議其獲功官兵與對陣被傷兵丁容臣動屯謀銀兩徑行賞恤至賊既東竄臣查邵莊隆益一帶荒苦至甚毫無可掠隨檄李國政與王根子裏五日糧緊促賊後臣又預設盛畧趙大允兩兵於鄜延候賊夾擊臣私計此賊業入殼中或卽其應滅之時臣忽以鳳寶告警牽臣以不得不顧之內地無奈撤兵而東鳳寶之賊爲過天星混天星兩大股及那家米闖將兩小枝乘臣在慶卽星夜奔突徑越涇三今且渡雒河

乾坤正氣集

卷四十五

九

犯同澄蓋及臣未至欲先據黃龍山爲逃死地臣隨飛檄司務廳陳繼泰扼守涇河毋縱賊渡第賊風馳雨驟又衆寡相懸未易截堵尙在可原臣草疏已畢又據監軍道王文清塘報六隊大天王爭管王等賊圍攻甘泉縣盛趙二將統兵馳援至甄家灣與賊對敵把總王萬虎斬獲首級一顆塘馬守備張守艾等又生擒賊塘一名抓地虎中哨守備張登朝生擒爭管王兒子小黃鷹餘賊奔潰立解縣圍又招出領哨賊頭一名滿山紅管隊一名小黑鷹救獲被擄難民張希春等一十五名查賊因鄜東有兵遂從西原遶走及聞鳳寶告警追兵撤赴內地賊徑圍甘泉旋被官兵衝擊北遁等情又據監軍道張京塘報稱賊見在鄜州西原知鳳寶有警本院大兵調回惟趙盛兵在鄜城賊准備打仗職兵自西賊不隄防機會可乘擬不至鄜州俟至張村若有路可抵賊營則密會王

監軍訂期夾剿等情臣仍檄該二道相機期會夾剿去後又據延安府報稱大天王的名高見係延長縣人於四月初一日到雜河地方卑職將王副將擒獲大天王兒子二名情繇寫帖招諭去後隨據大天王稟稱小的因饑寒所迫求生無路今王副將將小的嬰兒收住一名雷神保一名三家保未知存亡既然有命懇乞本府轉報將小的兒子送出一個來相見一面必然就撫等情臣相機操縱如果渠寇大天王悔罪輸誠實心乞命卽准收撫陣擒孽子給渠收養再照臣計前後東犯之賊約十之八九其未東者獨入隊闖將一股及闖王餘孽中斗星一股此外無可指數之寇夫此寇非卽破蜀郡邑之寇乎今獨以臣當之臣兵自甘兵而外未嘗另分邊鎮一旅臣餉戶部原議短給臣四萬而蜀餉又毫未解至乃臣之兵尙堪支賊臣之餉尙堪支兵臣在昔或屬空言今一

乾坤正氣集

卷四

三

一皆可明試臣惟有殫竭臣愚以勉圖仰報天恩於萬一耳再敢冒陳者臣之兵分防協擊者也乃使之兼防獨擊豈臣所敢諉卸倘旦夕各總鎮念臣孤危鼓義東援乃臣之至願然而必不能遽至也卽一二月內或至而兵又疲賊又遁矣向臣請與督臣分地分兵東西分剿度兵力賊情必應如此時樞臣楊嗣昌迫欲滅賊以西安無賊恐臣意在規避其所舉以責備臣者實疆臣之通病且臣奉有不得分畛畫疆之諭旨固未敢更有責陳今賊之大勢八九在東止闖將一股在西以四總鎮及各副將參遊之全力圖之自應刻期殄滅其東邊之賊紛紜正甚殲除量非易易臣今復申前請自與規卸無涉伏乞聖明速勅該部覆議賊勢雖盡在東督臣剿滅闖賊之後不必盡發各總兵於東臣止願分一鎮攜原食勦餉東援其餘兵將盡在西暫時休息俟臣將各賊驅勦西遁

督臣卽督西兵迎頭急擊卽不能使賊衆盡滅又必驅之使東尙賊復東折臣仍以臣兵及一總鎮之兵迎擊於東卽不能使賊盡滅仍必逼之使西而督臣仍以西兵迎擊如是則我靜賊動我逸賊勞我飽賊饑往還數次使賊疲於奔突而自不可支矣至應分汛地或卽照臣前疏區畫或樞部另爲酌議其應分東援之鎮必應於曹左兩鎮擇撥一鎮以兩鎮之汛地兵馬皆與臣尙相關涉臣調度爲便也臣向以尾賊亦可滅賊第視尾賊者如何人耳今尾賊諸將官且忽失賊之處賊何能滅也故臣又謂滅賊要著必應如此如第與賊俱鶩臣不知奏效何日矣伏乞聖鑒施行爲此具本謹題崇禎十一年四月初七日具題五月初二日奉旨該部看議速奏

報寇孽率衆投撫疏

乾坤正氣集

卷四百九十五

三

題爲寇孽率衆投撫謹報解散安插確數以祈聖鑒事先於二月二十九日據監軍道僉事王文清塘報賊首一朵雲等四名率衆投撫等情據此臣一面檄行監軍商雒二道仍行山陽縣審察如投撫果眞卽令解散安插已於三月初三日塘報閣部訖今於四月初五日據山陽縣知縣常吉中報又據商雒道副使邊崙塘報各到臣該臣看得山陽地方與上津接壤一朵雲等盤踞上津六郎關一帶出沒肆掠於商雒爲臥榻之賊一爲官兵追迫輒遁入商雒其視商雒又通逃藪也自秦兵駐防商雒賊營窟之計已窮而遊釜之勢日促故其化豺狼爲鴻鴈易牛犢以劍刀豈眞悔罪慕義蓋實無可奈何此正樞臣楊嗣昌所謂形格勢禁之明效也第恨荒山兵難久處又秦寇殊多臣以有數之兵隨賊四應不能逐日守山然有此五百人之投戈則我兵數月之苦守非徒然矣

今據該縣冊報招撫過共五百一十九名內解散歸各原籍者一百九十七名見在該縣給田耕種者三百二十二名造具姓名冊貫清冊前來固可無虞反側永保輯寧矣其在事監軍道王文清商箴道邊崙山陽縣知縣常吉應請議敘其差委員役小王虎劉應祥史邦遂楊世重張秀等臣酌量給賞外伏乞聖鑒勅部施行爲此具本謹題崇禎十一年四月初七日具題五月初四日奉旨該部知道

報澄城捷功疏

題爲大寇合股東犯官兵齊力奮剿仰仗天威恭報奇捷事照得大寇過天星等自鳳寶東犯直越涇三富同在澄城縣地方搶掠臣先於慶陽聞警馳回追剿料賊欲倚黃龍山盤踞爲害臣親提官兵夜渡雒河馳至澄城分兵五路按期進發於四月十二日在

乾坤正氣集

卷四十五

五

楊家嶺虎兒田馮原等處大戰獲捷斬級千餘生擒活賊及奪獲男婦盔甲器械馬騾無算先於陣前差報部科訖今於本月十九日據潼關兵備道丁啟睿監軍道王文清塘報准副叅遊都鄭嘉棟等牒報三月二十六日過天星等大夥自蜀入秦突犯鳳翔蒙撫院與按院檄令監軍道督副將趙大允盛畧兩營官兵從間道南下一面督率鄭嘉棟李國政王根子張文燿等營各官兵前往鳳翔迎頭截殺兼程馳至邠州據報賊已過涇三一面檄調原任叅將解文英遊擊王萬策各統駐防高維之兵同管餉西安撫民同知王明福前來合勦撫院復繇三水淳化至蒲城賊已繇同州地方晉城渡雒河意欲盤踞黃龍山一帶搶掠賊倚北山爲營須於東西兩面併正南一路會兵齊進方可制勝隨檄監軍道督甘兵自中部宜君繇白水徑抄黃龍山先據險要以扼賊路復檄潼

關道督潼關精勇營自朝邑馳赴澄城合剿令原調商維駐防遊擊王萬策統領廿兵并原任叅將朱國樑統領屯兵星夜馳赴黃龍山與監軍道所統趙盛二副將合兵檄令贊畫司務陳繼泰統兵扼維河管河同知王明福督叅將解文英及田時升駐蒲白以防賊潰撫院隨於初十日酉時督領副參遊都鄭嘉棟等兵自蒲赴澄三更至維河蒙撫院不避危險策馬先渡各官兵聯絡過河五更入澄城兵馬盡伏城內不許一人出入以洩兵機密探賊營住縣北沿山一帶馮原劉家凹劉家圪老南北趙莊上下彌家村黨家莊虎兒田等二十餘村首尾七八十里煙火相望聯絡不絕離澄城縣七十餘里隨隄監軍道移會鄭嘉棟等併督趙大允盛畧兵繇白水趙行一百八十里亦於十一日寅時到黃龍山屯兵夾剿約以鳴砲爲號隨蒙撫院繪圖分兵四路其黃龍山之兵專

乾坤正氣集

卷四百九十五

五

堵黃龍山一路各照派定村莊一齊勦殺隨分馬步官兵八百七十員名砲手五百向東路勦殺武安村高原村雷村寺莊之賊分馬步官兵一千一百一十八員名砲手二百四十有三赴西路勦殺密石南北趙莊上下彌家村黨家莊溝西上下村之賊又分馬步家丁八百二十一員名砲手五百分中路勦殺何家莊羅家凹楊家嶺虎兒田喬莊之賊又分漢土馬兵四百餘員名赴河西勦殺馮原劉家凹之賊督家丁一千五百八十三員名從黃龍山約會夾勦於十二日黎明潛至賊所申明號令賊已知覺將老營打發起身惟留精兵迎敵職各官兵照依派定汎路村莊一擁齊衝死賊遁走官兵乘勢追砍叅將鄭嘉棟都司張一貴李世春等從東抄殺遊擊李國政都司張文耀等從西路殺入副將王根子守備胡安等從中路殺入叅將王永祥從河西馮原一路追殺官兵

力戰死賊大敗官兵窮追逼賊老營賊護老營益拚命死鬪官兵齊力圍攻當將賊老營衝開副將王根子家丁池化受將過天星親姊張氏擒獲其餘擒斬射傷砍殺及落澗墮崖死者不計其數賊潰徑向黃龍山奔遁塵土障天監軍道督副將趙大允盛畧郭鳴鳳等同王萬策塘馬哨見塵起知大兵從東南殺來卽於馬上傳諭諸將士務要勇往接殺各官兵無不踴躍直從黃龍山殺下信砲相接趙大允盛畧領官兵奮勇撲砍死賊驚見我兵從山頭殺下復向東奔趙大允親執白旗領衝鋒官丁同盛畧一齊赴殺與李國政領李文奎李國燾等兵會合一處衝殺愈勇死賊乘馬滾溝陣前喊稱我過天星混天星從來未喫此虧乃復將各哨精兵傳合一處拚命抵當時已過午各路又將新造白甲官兵直撲賊中砍殺賊愈不能支遂奔石堡川又上射公山五路官兵齊力

乾坤正氣集

卷四覽七

五

趕殺仰而上攻廩戰時已至申遊擊李國政謂此戰必須穿窺賊營方可盡殲卽令本官內丁二隊喊殺直入賊中射殺穿紅蟒甲賊頭一名死賊大潰時已至酉賊斬死賊千餘滾跌及帶傷死者無算餘賊哭泣逃奔有不入大營四散落草者亦不計其數天色漸晚乃鳴金收營監軍道仍督趙大允等兵回黃龍山防賊暗竄白富各營收兵回營查得中軍叅將鄭嘉棟所部官兵斬獲強壯賊級一百八十四顆生擒活賊五十六名奪獲馬騾五十五匹頭婦女八口鐵盔甲三十六頂副綿盛甲一十九頂副弓箭刀共六千一百三十五件陣亡家丁宋學孔等四名重傷家丁張英等九名輕傷家丁王天杜甯有德二名後左營遊擊李國政所部官兵斬獲賊級二百八顆內官丁李文奎等斬賊頭目領哨老管隊一撮風等首級二十二顆強壯賊級一百八十六顆生擒活賊八十

名婦女十口奪獲馬騾三百二十七匹頭鐵盔甲四十二頂副
盔甲七十三頂副弓箭刀一千二百一十四件陣亡隨征把總一
員王國武土丁一名撒兒計新營副將王根子所部官兵斬獲賊
級二百二十九顆內官丁王建都等斬賊頭目領哨老管隊虎頭
大王等首級二十八顆強壯賊級二百一顆生擒活賊四十一名
婦女二十二口奪獲馬騾三百二十四匹頭鐵綿盔甲一百五十頂
副弓箭刀三千四十件陣亡土丁阿桑等三名重傷官丁張一鳳
等九員名輕傷家丁一名中營都司張文耀官兵斬獲賊級六十
二顆內官丁范廣等斬領哨老管隊青背狼等首級八顆強壯賊
級五十四顆生擒活賊一十二名婦女四口奪獲馬騾七十三匹
頭大旗一桿鐵綿盔甲五十五頂副弓箭刀一千四百六十件鐵
鞭一十一根潼關營叅將王永祥所部官兵斬獲賊級一百二十

乾坤正氣集

卷四十五

五

七顆內官丁艾登舉等斬賊領哨老管隊紅狼等首級九顆強壯
賊級一百一十八顆生擒活賊三十一名奪獲馬騾三十一匹
頭盔甲弓刀器械共二千三百一件重傷官丁馬蛟麟等九員名
輕傷家丁李賢等七名澄城縣鄉兵斬獲賊級三十五顆前右營
副將趙大允所部官兵斬獲賊級八十二顆內官丁郭鳴鳳等斬
賊頭目管隊明樓等三十顆內守備趙完英斬級一顆面刺大王
二字據生擒活賊黑鷹認識係混天星哨頭領三千人強壯賊級
五十二顆生擒活賊二十四名婦女八口奪獲馬騾二百五匹頭
盔甲五十三頂副弓箭刀撒袋共二千二百一十二件重傷官兵
張我耀等二名甘營副將盛畧所部官兵斬獲賊級三十二顆內
官丁辛土谷赤等斬賊頭目新天王等首級一十一顆強壯賊級
二十一顆奪獲婦女二口馬騾一百六十一匹頭盔甲三十六頂

副弓箭刀器械俱全陣亡家丁劉尙仁等六名甘營遊擊王萬策所部官兵斬獲賊級五十八顆內官丁劉建勳等斬賊頭目下山虎等首級二十二顆強壯賊級三十六顆奪獲馬騾一十八匹頭陣亡千總一員葛衛國家丁一名李進監軍道守備朱貢瑞等斬級五顆生擒活賊一名奪獲馬騾九匹頭黃龍山守備賈奇珍內丁袁汝欽等斬獲賊級一顆生擒活賊一名守備呂承誥斬級一顆邱加遇斬級一顆以上各營通共斬級一千二十五顆內據生擒活賊來虎黑鷹等併賊婦認出各營官丁李文奎等斬獲有名賊頭目領哨老管隊一撮風等首級一百三十顆強壯賊級八百九十五顆生擒活賊二百四十六名俱當陣乞降解驗審明各給免死票發回原籍奪獲婦女五十四口俱發澄城縣招諭親屬認領其所獲功級驗明發該廳縣收貯仍取印結附卷訖各營奪獲

乾坤正氣集

卷四十九

美

馬騾一千一百九十九匹頭馬匹堪用者給兵丁准自備入營騎征驟頭堪用者留營給價充官運糧其馬騾併驢不堪者分賞有功併原獲及同隊同伍兵丁各營共奪獲鐵綿盔甲四百六十四頂副大旗一桿鐵鞭一十一根弓箭刀撒袋共一萬六千三百六十二件仍令原獲兵丁收執隨營應用陣亡後左營把總一員王國武甘營千總一員葛衛國各營土漢兵丁朱學孔等一十四名陣失併射死各營官馬三十一匹自馬一十五匹重傷官丁徐成等四十員名輕傷官丁岳友才等十員名重傷官馬一十八匹自馬一匹輕傷官馬六匹等因塘報到臣該臣看得過混兩寇衆盛精強並稱雄於諸大寇之中烈焰兇鋒不可嚮邇八年之覆曹帥九年之陷俞帥十年之馭祖帥皆兩寇之爲也今復掠蜀飽還聲勢益橫又有邢家米闖將等諸小股爲之羽翼乘徽秦夾勦之稍

踈遂繼六隊大天王爭管王混天王之後分道東窺知臣有事慶陽輒直抵涇三及臣未返西安遂飛越同郃屯劄澄城將倚黃龍山爲負嶠地臣聞警馳追算賊倖中以我兵先發據山使彼衆計窮營窟臣復提旅親征啣枚密進河水難渡臣卽率衆投鞭曙色未分兵已入城息鼓乃爲精選鄉導細畫地形分兵分某期於一網兼收爲衝爲援毋令針芒或漏巖門禁以防預洩得好謀而破狡謀二鼓出師五路向賊平原萬隊旣若輸地以來高嶺一軍又已從天而下賊驚駭莫測應接不遑加以士卒盡選練之驍雄號令遵申明之約束故能奏功一鼓斬首千餘擒降累百死傷潰散及所獲甲馬器械不可勝記過混二賊僅以身免此實秦中剿賊以來未有之大捷也非賴皇上聖武旁昭神謀遠運及朝臣計畫周詳樞部指授盡變與夫督臣同心共濟按臣新任協恭豈臣之

乾坤正氣集

卷四百九十五

七

區區所能辦也臣受寄巖疆奄及二載無裨戡定臣罪實深臣不敢借此自贖至於在事道將與行間材武如不爲破格優異恐無以作奮新之氣而鼓樂効之心故臣不得不以賞不逾時之曠典仰懇皇上立沛恩綸勅部甄敘如潼關道臣丁啟睿分巡關內監軍道王文清俱應優敘臣標下中軍叅將鄭嘉棟往來策應所獲功級疊疊後左營遊擊李國政奮銳先登誓以死圖報身中七矢而塵戰益力且部下所獲功級最多新營原任副總兵王根子衝鋒破陣功級獨多於各營且合水之役俘獲大天王之二子今又俘獲過天星親姊張氏查張氏有夫混名二虎子混名大屋宿俱以慣戰得名賊中過賊倚之如左右手張氏旣獲則過賊氣奪而二賊皆可間之使爲我用前右營原任副總兵趙大允設伏山上進兵悉如期會潼關營叅將王永祥率關兵馳至獨分溝西一路

掩擊得勝逼賊使就我夾擊而獲級且多中營都司僉書張文耀所部降丁僅一百四十而每戰必扼要爭奇都司僉書張一貴環甲臨戎能使千人自廢甘營副將盛畧提甘營馬步一千雖獲級較少然與趙大允聯鑣並進能無失夾剿之期原任太平堡守備加銜遊擊王萬策繇商維遠至兵不及食息馬不及飼秣卽毅然隨勦而獲級差多以上各將均應優敘內王根子原任薊鎮馬蘭副總兵都督僉事降三級又因陝西剿賊題叅擬戍尙未部覆前以擒闖功奉旨另案酌議昨合水捷功臣已題請量與湔除趙大允以原任陝西流曲副總兵題叅遣戍前以殲蠹功部題奉旨戍案量與湔除以上二員俱應量予復職王萬策新經甘肅按臣糾叅奉旨提問應照從輕量擬俾殺賊自贖張一貴前因藍田兵叛奉旨戴罪勦賊自贖應免戴罪督陣兵部差官施應堂標下旗鼓

乾坤正氣集

卷四 兵革

五

都司王國棟隨征都司孫鑑郭鳴鳳守備胡安崔應舉原任叅將郭清原任遊擊張承烈分營督戰鼓勇直前內施應堂王國棟孫鑑郭鳴鳳胡安崔應舉六員應各加一級郭清以原任宜塞叅將被劾奉旨提問擬徒相應論功未減張承烈以原任紅德城遊擊被劾奉旨革任回衛相應論功敘用中營中軍李毓椿千總劉吉明臣把總馬頁圖後左營守備張鵬翼李文奎千總李國愛苗大勝吳養純前右營中軍守備党威千總李遇春郭永壽武大定拓應卿新營中軍王建都實授都司趙祥千總張大成潼關營千總馬蛟麟以上十八員躍馬當先摧鋒斬銳俱應加一級中營隨征都司李世春千總楊王庭把總魯典魯宗周陳自興後左營中軍守備李秀守備楊豹路哮囉路著太千總羅國用把總賀登第劉友元隨征守備楊成材官王友蒼前右營千總趙完瑛新營千總

杜成祿中營張文耀下千總范廣把總牛希才潼關營中軍艾登舉把總劉福祿監軍道下中軍守備鍾鳴豐把總孔珠甘營盛畧下守備楊奎光甘營王萬策下千總席大卿黃龍山駐防加銜守備賈奇珍以上二十五員戮力苦戰敵斬功多併應紀錄原任叅將解文英田時升從商州調剿兵馬急趨奔波臣因令伏兵蒲城以防賊潰雖未交鋒勞不可泯應俟彙敘駐劄黃龍山西延捕盜同知徐文泌管餉西安撫民同知王明福澄城縣知縣傅應鳳蒲城縣知縣田臣管餉咸宜縣縣丞喻品叅謀武清周雷鳴時或撥防兵隨營協勦或選鄉導審察地利或轉運糧餉備辦軍需併應敘錄內武清周以原任知縣被劾遣戍臣稔其素有才幹故以叅謀委用今本官隨征已久頗多勞績至自募丁健殺賊立功所騎戰馬亦皆本官自備費殊不貲亦應量與湔除其各營斬獲首級

乾坤正氣集

卷四 克吉

无

應請照兵部題頒新例每顆給銀五兩用示鼓勵臣查有臣前題降丁拓攀高兩次掘獲窖銀三千三百餘兩堪以動用除即先照向來舊例每顆賞銀三兩俟欽賞頒到仍照新例補足其陣亡後左營把總王國武甘營千總葛衛國均應議卹內王國武以所乘戰馬付之主將步戰殞身尤宜厚贈以旌忠義至標下贊畫司務陳繼泰虛怯無當本官倚借京街鴟張於桑梓之地官民上下罔不側目錢糧出入亦不清楚伏乞聖明勅部察議爲此謹題崇禎十一年四月二十二日具題五月二十日奉旨奏內有功及陣亡員役該部核議敘卹欽賞銀兩著即給發陳繼泰併即察議速奏

報官兵迎剿獲捷疏

題爲狡賊聞風先遁我兵迎勦獲捷恭報調度期會情形仰祈聖鑒事照得流寇過天星混天星等自澄城大創後與六隊爭世王

等俱奔竄延安地方臣因西安麥秋未畢將標下官兵分布白蒲富耀等處扼防五月初四日據分巡關內監軍道僉事王文清塘報延賊苗頭已向鄜州地方臣卽檄調派防白蒲富耀各官兵俱赴中宜堵擊并移會總兵左光先統兵自鳳翔馳赴慶陽夾剿臣亦於卽日赴中宜調度絲三原耀州行次同官縣欲候兵齊卽從中宜進剿初七日據宜君縣塘報賊於初六日三更發老營奔馬蘭等處精兵天明亦去等情臣因賊勢西奔恐兵從中宜尾追不能殲掃且慮賊從馬蘭突犯涇三一面督發遊擊李國政統兵自同官馳赴中宜從東防擊臣仍返耀州督發中軍叅將鄭嘉棟原任副將趙大允叅將解文英等兵馳赴三水扼堵并移會總兵左光先自慶陽截剿去後初八日又據塘報昨初七日探賊老營奔西北今仍折回店頭蘇家險等處等情臣查賊屯店頭等處驚疑

乾坤正氣集

卷四百五十五

三

不定官兵一至賊非西奔慶陽必南犯三水我兵宜三面約期緊促使賊遁逃無處隨檄監軍王文清監督副將叅遊鄭嘉棟趙大允解文英王萬策等兵從三水眞寔扼剿以防賊潰臣親提副將王根子都司張文耀等兵赴中宜與李國政之兵約於十四日從中宜進剿復移會該總兵亦於十四日馳赴隆坊進剿賊潰勢必南奔三眞彼中有鄭嘉棟等兵扼堵店頭隆坊之兵創賊之後卽乘勝追擊第慮賊情瞬息變幻兵機遙度爲難仍宜隨機應變俟兵至隆坊店頭該總兵與臣彼此移會進剿的期如東西各有可乘之機期會可以無拘卽隨便圖之去後十一日臣抵宜君據報賊知官兵至老營已奔老山惟過天星等精兵在於隆坊西北侯村河李家凹大平原等處打糧十二日臣抵中部縣議於十四日發王根子李國政等兵從隆坊進剿十三日卯時准左總兵手本

回稱本鎮從合水邵隆進剿則宜州西華池無兵賊乘空逸出我
兵返賊不及昨蒙軍門手札內云曹祖兩總兵初四日自秦州起
身走固原計十四日可到慶陽若賊轉向張村邵隆北路自有曹
祖兩總兵堵截本鎮准於十四日至賊駐之處剿殺詩乞貴院提
兵北進使賊同時兩面受敵首尾難顧可藉運籌而成大功期會
固如此議約但賊情變幻若早晚離店頭西犯保安蘆保則本鎮
兵近貴院兵遠應遵憲檄所云東西各有可乘之機不拘期會隨
便而圖之矣等因又據李國政塘報太平原之賊於十二日夜從
猿猴神嶺入山奔竄距官兵已遠難以窮追臣隨查此山人煙斷
絕不惟官兵未易深入卽賊亦難久居勢必出山奔突非西遁合
慶環固必南犯眞寔三水臣復移會總兵左光先督兵從西視賊
所向如西奔合慶則該鎮就近迎頭截擊如從合水北竄環縣固

乾坤正氣集

卷四九十五

三

原則該鎮急移曹祖二總鎮於彼處極力扼剿如南奔眞三則有
臣預發鄭嘉棟等兵足資堵殲使賊不得西奔南竄務必東折臣
督兵從東扼擊賊一再往返掠糧不得困餓待斃可以盡殲移會
該鎮并咨督臣去後十四日又據王根子李國政等報過天星等
知官兵於十二日到中部縣賊於本日夜二更俱起營西奔緜猿
猴神嶺栢樹店大山犯慶寔合水等處去訖等因十五日據監軍
王文清探報十二日左總兵在羅山鎮打仗得功賊已大潰奔駱
駝巷往東南中部地方等情臣查過天星之賊十二日二鼓方始
西遁該鎮所殺之賊必係混天星一股且各賊自聞兵西遁並未
東折恐賊從西奔竄復移左總兵會查堵剿去後十六日准該鎮
手本移稱本月初十日准貴院手本過混等賊折回店頭蘇家險
等處約會十四日彼此進兵以期夾剿等因到鎮准此本鎮隨遵

照指授啟行間忽於本日申時據報初九日賊塘數十驍出駱駝巷往徑蘆保兒嶺看路情形亦具報矣十一日寅時復據報賊於初十日卯時經過駱駝巷往蘆保嶺羅山阜去本鎮卽日取道襄棗秣馬午時肅兵潛進十二日黎明馳至羅山阜賊已起營追至羅保嶺官兵奮勇力戰斬首二百七十顆生擒五十六名審據活賊口供西來者係混天星新天王張妙手三家之賊畏怕貴院雄旅迫剿故奔西躲避其過天星之賊走張村邵莊隆益至合水相合又有言駐劄隆坊承討招安其混賊被殺之後或奔台過賊亦不可定本鎮列營羅山阜分投差撥嚴探看犯某路卽行緊追至於過天星未知果約去合水抑尙駐隆坊請受招安如去合水本鎮自應追殺如駐隆坊另聽調度等因准此查臣十一日據報賊知官兵至遂發老營已奔老山止有過天星精兵在隆坊西北太

乾坤正氣集

卷四十五

三

平原等處打糧是晚臣督王根子張文耀兵駐宜君因過天星投稟赴臣乞撫臣以我兵不能卽至賊所故給與諭帖以緩其遁令其悔罪自決及十二日臣抵中部各賊遂於是夜西遁非過賊假撫探兵則知混賊被創急遁合營除臣復移該鎮賊如西奔合慶該鎮就近迎擊賊如北竄環縣固原該鎮急移曹祖二鎮扼剿如南遁眞崑三水有臣預發鄭嘉棟等兵堵殲賊如東折臣從鄜中之間督兵扼擊使賊往返延慶荒山中掠食無所逃生無路卽可盡殲外該臣看得過混等賊自澄城被創北奔蹲伏延安一帶惕息不敢南下者半月餘矣茲以延地荒苦無糧可掠乃從甘鄜蹙出分突中宜恐臣之標旅又忽飄馳迅擊驚棲不定到處窺探臣甫次同官而彼已西奔臣復返耀州而彼又折還比臣提師再進而彼益聞風急走雖臣許撫以緩之亦不能使之少需故竟乘夜

奔逃矣幸臣三方之布置頗預累次之申約已明混賊先奔一日至羅山阜適與鎮臣左光先及副將馬科兵遇迎頭一擊斬級二百七十顆生擒五十六名賊遂大潰賊以東南俱有官兵故未敢折腳中敵三淳度必馳合過賊併突慶陽據左鎮移文稱曹祖兩鎮於五月初四日自秦州起行計十四日可至曹鎮或爲賊憚又有祖鎮佐之以併力此路賊自不能爰爰逸去也臣查鄜州百里之西合水數十里之東眞寔百里之北慶陽東川之南橫豎約三四百里彌望荒山掠食無所賊藩觸此中萬難久處非西突合水走寔邠鎮涇則東返鄜州折甘延中宜非南下眞寔突三淳涇三則北越慶陽奔環縣固原第使臣兵能扼之於東南各鎮兵能堵之於西北各勿縱令賊逸併斷其出掠之路賊窘促坐困殺食牲畜一盡惟有束手就死而已樞臣所謂雖有十萬之衆難禁三日乾坤正氣集

之饑正此地此時滅賊之要著也至延北之賊惟六隊爭管王二股益自合水賊亂混天王以潰散失羣西遁頃報自環慶折還必已附入過混之營大天王因二子被擒已經投撫止餘六隊爭管王彼中悉索鎮堡官兵必能辦之若漢中雖報闖將復繇畧沔犯寔羌然據各鎮塘報闖將自河洮屢創之後所餘無幾自難復振倘微天幸過濕壘勿就殄餘賊次第可滅三秦庶有蕩平之期矣除臣移咨督臣併移會左鎮及申飭臣標下各將鄭嘉棟等各嚴加堵扼及左鎮捷功俟查明題敘外爲此謹題崇禎十一年五月十七日具題六月十四日奉旨知道了該部知道

報三水捷功疏

題爲馳報捷功以紓聖明西顧之憂事照得混天星過天星米闖將等各股大寇繇延安折犯中宜臣馳約勦師與臣標兵四面圍

賊以標兵分任東南二面臣親督遊擊李國政原任副將王根子等兵於東面逼賊以臣中軍叅將鄭嘉棟原任韓邵叅將解文英原任副將趙大允甘營原任遊擊王萬策於南面候剿賊從合水突出總兵左光先曹變蛟等從慶陽馳追賊折三水邠州馬蘭等處鄭嘉棟解文英趙大允王萬策等兩日三捷擒斬約一千名顯投降降男婦六百臣復介馬親督王根子等兵繇中部宜君趙和尚寺馬蘭一日夜行二百五十里入山搜剿又收降大掌盤子混天星邢家米闖將火焰斑就地飛劉秉義等并過天星領哨通天柱尖兒手等及各營領哨管隊精兵與隨從男婦約二千五百餘人潰散無算先於五月二十一日差官報部科訖今於本月二十四日據監軍道王文清塘報准標下中軍副將叅遊鄭嘉棟解文英趙大允王萬策塘報混天星過天星邢家米闖將等賊繇涇三東

乾坤正氣集

卷四十五

五

犯至澄城地方四月十二日我兵擒斬一千二百餘名顯已經塘報訖死賊狼狽北遁延安蒙撫院以西安二麥正值收穫恐賊復南下籛東必犯韓邵白蒲繇西必犯同耀淳三仍宜分布扼防隨令監軍道親督叅將鄭嘉棟原任副將趙大允扼防白蒲東援韓邵遊擊李國政原任副將王根子都司張文耀扼防富耀西援淳三又蒙移會延綏撫鎮發兵從延北剿殺於五月初三日據報混過等賊自雜奔鄜苗頭西向中宜本職等極力堵剿又蒙監軍道調取派防白蒲富耀及藍田駐防原任叅將解文英雜南駐防遊擊王萬策各官兵俱赴中宜堵擊并移會左總鎮統兵自鳳翔馳赴慶陽夾剿本院亦於即日籛三原抵耀州先提遊擊李國政原任副將王根子官兵行次同官縣欲候兵齊卽從中宜進勦初七日據宜君縣塘報賊探知官兵將至於初六日三更將老營先奔

馬蘭等處精兵天明亦去蒙本院因賊勢西奔恐兵從中宜尾追不能殲掃且慮賊從馬蘭突犯涇三一而督發遊擊李國政統兵自同官馳赴中宜從東防擊本院仍返耀州初八日又報賊仍折回店頭蘇家險等處蒙本院檄因查賊屯店頭驚疑不定官兵不至賊非西奔慶宜必南犯三水我兵宜三面約期緊促使賊逃遁無所其中宜一路本院親督進剿無用多兵除量提遊擊李國政副將王根子官兵及都司張文耀家丁先赴中宜從東進剿其餘四營官兵應赴真三截剿并移會左總鎮督兵自慶陽馳赴隆坊從西進擊然賊情瞬息變幻兵機速度爲難仍宜隨機應變如東西各有可乘之機期會可以無拘卽隨便圖之該監軍道親督中軍叅將鄭嘉棟原任副將趙大允叅將解文英甘營遊擊王萬策各官兵馳赴真三分布設伏扼防南奔仍急督四將遠行偵探極

乾坤正氣集

卷四十五

五

力堵剿務期一鼓殲掃萬勿致賊遁逸蒙此監軍道卽移會本職等俱要仰遵撫按兩院憲檄鼓銳出奇擒渠掃蕩滅此朝食准此偵剿間十一日本院兵至宜君據報賊知兵至遂將老營發奔老山止有過天星等精賊在隆坊西北太平原等處打糧是晚過天星等投稟遣令小賊管來子赴院乞撫本院以我兵不能卽至賊所因給與諭帖以緩賊遁令其悔罪自決及本院抵中部據報各賊遂於是夜西遁蒙本院檄云十三日准左總鎮手本覆稱本鎮從合水邵隆進剿則宜州西華池無兵昨蒙軍門札開曹祖新兵初四日自秦州起身計十四日可到慶陽若賊轉向張村等處北路自有曹祖兩總兵堵截本鎮准於十四日至賊駐之處勦殺請乞貴院提兵北進期會固如此議約但賊情變幻若早晚來西犯本鎮兵近貴院兵遠應遵憲檄所云東西各有可乘之機不拘

期會隨便圖之准此查賊已西遁本院復移該鎮賊如西奔合慶該鎮就近迎擊賊如北竄環固該鎮急移曹祖二鎮扼剿賊如南通眞益三水有本院預發鄭嘉棟等兵堵截賊如東折本院從鄜州之間督兵扼擊使賊奔突無路掠糧不得困餓待斃即可盡殄除移該鎮查照督兵堵剿并移會軍門及按院外該道速督各將遠偵堵剿務期殲掃不得疎縱蒙此本道卽移會各將遵照十三日據報十二日左總兵在邏山阜打仗賊敗奔駱駝巷往東南中部地方蒙本院於十五日接報查賊聞兵西遁並未東折中部地方亦未報有賊警恐賊從西奔竄復一面移文左總鎮會查堵剿一面檄監軍道卽督各將確探堵剿俾賊不得遁逸蒙此卽移各將嚴加偵剿又蒙本院令箭傳諭慶益一帶已有左曹等鎮兵馬足能堵剿各將宜駐三水馬蘭防剿等因該本職鄭嘉棟解文英

乾坤正氣集

卷四

五

駐防三水趙大允王萬策駐防馬蘭各督士卒偵剿間本月十八日午時據報頭哨已至湫頭原一帶直奔西南等情該本職與解文英會議過混等賊素稱狡悍我兵當分兩路夾擊出奇制勝使賊前後受敵當卽飛移趙大允等知會十九日本院中軍叅將鄭嘉棟統領該營都司張一貴等官兵八百餘員名本院叅將解文英等統領官兵八百餘員名并會同西安府同知孔宏燮發該縣鄉兵五百名緜三水地方迎頭進剿本院監營原任叅將郭清等官兵七百六員名并監軍道中軍守備鐘鳴豐隨征家丁五十名甘營遊擊王萬策統領官兵四百九十餘員名俱從馬蘭赴邠州地方當先邀擊并飛報撫院訖本日寅時賊果漫山塞野蜂擁而來本職等以逸待勞預布官兵扼險設伏更番迎敵賊率精兵撲戰我兵奮勇鏖戰我之伏兵衝出賈勇敢殺賊不能支鄭嘉棟所

部官兵當陣斬獲賊級一百五十七顆生擒活賊一百一十二名
婦女二十口奪獲馬騾一百六十七匹頭弓刀箭五百六十件鐵
綿盔甲八十五頂副餘賊披靡奔竄我兵馳追有掌盤子劉秉義
等率領男婦約四百名口跪伏馬前乞命職等遵檄准收投撫叅
將解文英所部官兵斬獲賊級一百六十五顆生擒活賊七十名
婦女二十三口奪獲馬騾一百六十一匹頭鐵綿盔甲七十二頂
副弓刀箭一百五十二件三水縣鄉兵加銜守備陳登盈等斬獲
賊級四十二顆餘賊分爲兩股混天星一股奔去馬蘭宜中赴撫
院軍前投撫本職等卽飛報本院發兵馳赴馬蘭勦撫過天星一
股奔去西南史家店地方知被處已有趙王二將官兵在前截剿
正中本院分路截擊本職等仍催兵向前追殺使賊不知前有伏
兵一意奔竄該副將趙大允遊擊王萬策哨賊已至遂於前途披

乾坤正氣集

卷四十九

三

殺賊且戰且走我兵賈勇撲砍賊皆潰竄我兵追殺四十餘里副
將趙大允所部官兵當陣斬獲賊級四十二顆生擒活賊五十二
名奪獲馬騾一百六十五匹頭撒袋二十一副弓箭刀五百六十
四件王萬策所部官兵斬獲賊級一十二顆生擒活賊一名奪獲
馬騾九匹頭紬綿鐵甲一副弓箭刀四件副賊之滾溝落崖者不
計其數時天晚不便前追收兵暫屯南河村甫二鼓趙大允等傳
令兵貴神速急宜乘勝追剿各兵裹糧已畢有賊一股潰折三水
炭店溝地方二將復督各兵連夜馳追於二十日寅時賊仍出死
力回敵我兵一齊衝殺賊不能支拚命從邠州地方奔西我兵因
連戰兩日又兼大溝阻隔收營查得趙大允所部官兵當陣斬獲
賊級八十七顆生擒活賊八十一名當陣乞降混天猴通天柱等
男婦二百名口奪獲馬騾一百三十四匹頭弓箭刀二百四十件綿

盛甲一十八頂副遊擊王萬策所部官兵斬獲賊級一百一十一顆生擒活賊六十四名奪獲馬騾九十四匹頭已箭五十七副刀三十五把綿甲九副監軍道標中軍守備鐘鳴豐等斬獲賊級七顆奪獲弓箭刀一十七件騾一頭是日本院據西路塘撥傳報趙大允等統兵已赴邠州地方截剿恐賊西邊被殺奔突馬蘭一面檄令遊擊李國政統該營官兵仍在中宜地方扼賊北奔一面親督副將王根子中軍王建都等自中部馳赴宜君先令土丁飛赴馬蘭哨探入山搜剿比有賊頭大掌盤子混天星的名郭汝磐邢家米闖將的名米進善被各兵追殺窘迫欲赴軍前投撫行至馬蘭山後劉家店各賊以本院駐節中部相距遠復懷疑畏及前哨塘撥哨見王副將塘馬土丁回報前途又有黃帽達子截剿混天星等驚惕無措遂牽夥眾約二千人奔赴馬蘭城下具稟投降

乾坤正氣集

卷四覽五

五

隨諭各降丁赴趙和尚寺空堡內藏駐候撫院明示裁奪適本院差官至彼混天星與米闖將隨具稟帖內稱小的等原係良民因連遭荒旱逼在迷途萬死難贖小的等前在中部有乞撫之心但眾口難調今幸陳把總說撫院奉旨招安小的等眾情願投生等情蒙本院令副將王根子馳馬止兵暫退於玉華二十里本院單騎至趙和尚寺抓山虎等率眾羅拜馬前哭聲震天叩頭乞撫業本院宣諭朝廷恩威俱俯首傾心乞命俱准收降又有小掌盤子火焰班就地飛等原領約五百人逃匿山內亦即出山投降俱一體准收本院仍即起馬日馳二百五十里三更復抵三水仍令將混闖等賊營男婦約二千五百人俱赴三水縣點名安插查得各營官兵通共斬級六百二十三顆在邠州地方所斬者該州驗明收貯在三水地方所斬者俱擺列通衢蒙本院并監軍道飭三水

縣驗明收貯取有印結附卷共生擒三百八十名奪獲婦女四十三口共收降三千五十名口內大掌盤子混天星的名郭汝磐一股領哨孤山虎的名李玉傑走山虎的名郭應春王龍的名李望昇普天飛的名孫養教惠傑管隊一條龍的名張玉正江虎的名高政過天飛的名劉將過天王的名王守信飛龍的名李安猛虎的名楊秀頭番山虎的名田一秀飛虎的名張希雲劉輩的名曹丙英二點油的名楊君祿永長的名任之才隨虎的名李二惠國孝惠文英惠國順李有才白其金黃希全張有良李友士王進祿高靈線一龍莽率領男婦一千一百二十名口獻出馬騾一千二百一十四頭大掌盤子米闖將的名米進善一股領哨走口虎的名景友倉跟虎的名薛孟秋一盞燈的名蘇孟秋三刀毛的名王一節賀守亨管隊搜山虎的名楊守禮三要子的名高自卓增虎

乾坤正氣集

卷四覽五

五

的名劉望軒存孝的名馮守瑞笑虎的名張士英宋虎的名王景玉飛浪的名高明跟虎的名李可元喬應高飛鷄子劉二張新虎閻明朱朝貴小蒼子并率領男婦七百三十名口獻出馬騾七百二十一匹頭小掌盤子火焰斑的名高仁美一股領哨隨虎的名白養奇跑山虎的名黨丙友高宜普閻五管隊奎木狼的名王小則趙五劉成張聚寶王玉周之才梁長閻王尚禮劉大利高中兒趙玉李撓絲梁初志趙龍并率領男婦二百八十三名口獻出馬騾二百二十三匹頭小掌盤子統地飛的名白坤一股領哨草上飛的名封養正劉世安郭俊管隊走虎的名賀養浩俊龍的名王佐偏虎的名折邦俊過天龍的名薛方成一根葱的名劉昇曹養玉曹養正劉光友趙守全蘇宗儒任國宗周瓜子鄒一山并率領男婦二百一十名口獻出馬騾二百三十四匹頭大哨番山鷹的名

劉四禮管隊擲地虎的名朱尙遷并率領男婦四十一名口獻出馬騾三十二匹頭次掌盤子劉秉義一股領哨新虎的名張國能魔羅的名白那英馬上飛的名馬守伏管隊張虎的名張應庫三條龍的名王汝昇馬漢的名景彥一斗金的名周希貴來虎的名馮希才飛山的名高進賢來軍的名石立旗牌的名李自顯隨虎的名趙文耀沙將官的名李國寵騙過海的名趙應選并率領男婦三百一十二名口獻出馬騾二百六十九匹頭混天星下大哨頭李三管隊韓來選并率領男婦四十名口獻出馬騾二十九匹頭過天星下大哨頭尖兒手的名高英領哨四隻手的名張一科雲裡燕的名黃建恩管隊馮成劉福安崔友亮周彥奇王汝正閣自聰并率領男婦一百一十四名口獻出馬騾一百五十四匹頭大哨頭通天柱的名韓宗位領哨馮萬油管隊琉璃滑的名王世

乾坤正氣集

卷四

四

倫新燕青的名龐文升并率領男婦一百三名口獻出馬騾七十七匹頭大哨頭混天猴的名路三讓領哨迫天飛的名吳養世秦明的名趙可秀管隊北飛的名路川雙花的名位能八虎的名位養道并率領男婦九十七名口獻出馬騾七十五匹頭俱行監軍道同三水縣點查收訖內願隨征者收營隨征願回籍者給免死票發回原籍其各賊逃散及爲鄉民所殺未驗者不可勝算各營當陣奪獲馬騾共七百二十七匹頭馬堪騎征者給兵丁准自備入營騎征騾堪用者留營給價以充官用馱糧不堪者分賞各有功兵丁各營奪獲鐵編盔甲共一百八十五頂副弓刀箭撒袋共一千六百五十二件俱給各原獲兵丁備征陣亡兵丁張贊等七名傷斃各營官馬三十五匹自馬一十二匹重傷官丁寫令等二十六員名輕傷官丁馮在京等四十八員名等因到道塘報到臣

又據陝西監軍道右叅政樊一蘅塘報准固原總兵左光先塘報本鎮於五月十二日在羅山阜殺混天星等賊斬獲首級二百七十顆生擒五十七名已另具塘報訖混賊被殺之後復東遁鄜中地方本鎮十五日轉慶陽備辦糧糗同日曹總鎮統兵亦至十六日報賊走合水南山向西南撥隨獲一賊子訊據供稱混過兩賊又合營一處往西路搶糧卽知會曹總鎮迎頭攔殺本鎮追尾殲剿十八日至眞寔縣地方三河原大戰斬獲首級七十五顆生擒二十六名十九日至三水縣地方斬首級一百六十五顆生擒五十八名收降二百四名奪獲馬騾六十四匹頭等因又據該道塘報准臨洮總兵曹變蛟塘報本鎮十五日至慶陽據報賊從合水向原徑奔黑水河本鎮會同左總鎮同副將馬科提兵從合水大路追躡賊尾本鎮同副將賀人龍提兵從華池間道以截賊頭卽

乾坤正氣集

卷四九十五

單

連夜越寔州至早社十八日晚據報賊在湫頭原本鎮督統官兵連夜前進至眞寔又報賊於二更起營奔回邠州本鎮繇大廟提路馳至金村原適遇混過前哨精賊本鎮嚴督各將兵努力惡砍賊悉敗奔查得當陣斬首二百八十顆生擒五十名奪獲婦女一百六十口馬騾五百六匹頭等因又准寔夏總兵祖大弼塘報本鎮十六日抵邠州卽差官各路偵探十八日酉時據報有賊數千從三水逸出本鎮卽統官兵出城十九日黎明至赤茶坡與賊對敵斬獲首級二百三十八顆生擒一十八名收降一百一十七名奪獲馬騾一千餘匹頭等因各報到臣查秦中大寇自闖擒蠹殲而後則必首稱混過混天星固大寇中之最雄者也若邢家米闖將雖不及混天星然亦自領一營與混同驅並逐火焰班就地飛雖所領止二三哨然皆不附混過等營而各爲一營至劉秉義則

又全領張妙手之遺孽以錚錚於諸賊之中故皆得以掌盤子稱也各寇猖獗十年蔓延七省決裂至於今日我之元氣爲之銷索殆盡臣秉鉞三秦兩年碌碌竊以憤惋有心揮霍無具去歲樞臣楊嗣昌畫策大剿分餉措兵臣亦與有專責臣徬徨審顧拮据數月粗有可觀及大天王與爭世王混世王爭管王突犯平慶臣嚴申道將務逼使東臣報警之疏亦可覆按比合水一戰賊直走鄜延就我夾勦我師緊促其後勢在垂剪而混天星米闖將與火焰班就地飛劉秉義及今僅以身免狼狽西遁之過天星新天王等又復越鳳寶而東牽臣以不得不內顧之勢臣分身無術兼顧實難用是竊竊憂之然臣耿念癡腸不敢不以東邊剿賊自任重申前請明區區之愚忱已備載合水報捷一疏第臣矢願雖奢才疎識黯幸荷皇上威靈楊家嶺之役使賊膽落魄銷比賊遠折中宜

乾坤正氣集

卷四百九十五

聖

驚棲不定臣詳察地形變窮賊計馳約剿帥分布標兵又合督臣西來之師三月之內大小七戰總計此賊幾滅十分之八據臣標各將探得死賊隨過賊西奔者大約不及千人內精兵不能一百比臣晤督臣洪承疇云西奔之賊尚有二千精兵尚有二三百臣已密行賊所經過州縣確查具報該臣看得混天星等數澤兇頑乾坤沴戾或頡鬪頑過狎主梟獍之盟或合隊分營並張虎狼之勢蔓延七省罔非流毒之區烽積十年尙尠銷煙之日金鷄之赦累下全無繇作其悔心鐵馬之征不休迄莫能戢其逆志恩威兩頓剿撫俱窮頃復掠蜀飽還輒爾躡秦深入欺內地之單弱恃賊夥之衆強將謂我如彼何豈知今非昔比臣稟責成於樞部磨勵已閱三時荷特達於聖明報稱惟期一日擬嗣凱旋於黑水遂賀戰勝於黃山酋魄早禡軍聲大振泊北奔延鎮賊得緩死三旬比

西遠宜郊我遂出師五月跡其驚棲不定之狀度其潰奔必出之途千里合圍九軍齊奮旣雲屯而霧列或一地二營或兩地三營亦電擊而颺馳或兩日三戰或三日四戰在賊傷弓之後宜堪驚弩環張在我設網之餘肯使一面或漏故報捷之躡方絡繹而來乃傳飭之符猶聯轡以往遂使釜魚檻獸獻首而膏斧鉞者前後三千澤賊山猛革心而入縑縵者大小五股收渠散黨一朝幾致蕩平懷德畏威指日可期底定蓋過寇僅以身免虎無翼而難飛矧餘夥罔不心寒鷓有音而可格此實聖天子中興之烈亦惟師武臣大創之功欲鼓敵懷之忠宜渙酬庸之典若臣猥逢多事扞丹敢謂臣勞謬有積忱垂白嘗思母老幸我罔之無恙庶親闈之可依此屬至情別無他冀除督臣標下及各總鎮功聽督臣題敘外臣標下中軍叅將鄭嘉棟原任叅將解文英功實居首鄭嘉棟

乾坤正氣集

卷四百九十五

聖

前以澄城捷功題敘加級今請再加一級在解文英澄城之戰前已彙敘今請加一級本官先任韓郃叅將因病回籍調理後陝西按臣奉旨彙敘秦中剿功議加本官一級給有副總兵部劄今請以副總兵加級征勦原任副將趙大允甘營遊擊王萬策伏兵馬蘭聞警西馳一戰再戰兩日連捷趙大允前以殲蠍功奉旨戍案量與湔除又以黃龍山捷功題敘復職今應同前功通敘新營副將王根子鼓率土丁所向無前屯營玉華懾賊歸命後左營遊擊李國政扼險隆坊原獨當東面逼賊入網王根子先經題敘擬戍未覆以擒闖功奉旨另案酌議昨合水捷功已經題敘量與前除又澄城捷功已經題敘復職李國政前以澄城捷功已經題敘加級俱請同前功通敘中營都司僉書張一貴李世春每戰當先千人辟易旗鼓都司王國棟都司僉書張文耀新營中軍王建都戮

力行間屢有成效張一貴前因藍田兵叛奉旨戴罪勦賊自贖昨以澄城捷功免罪李世春前以澄城捷功已議紀錄王國棟張文耀王建都前以澄城捷功已議加級原任叅將李當瑞田時升郭清監營守備署指揮同知郭鳴鳳千總盧自友雷世英樊學仁臨陣督戰指麾嚴明郭鳴鳳前以澄城捷功議加一級郭清前因叅劾提問擬徒昨以澄城之捷論功未減今均請一體議敘中營中軍李毓椿千總明臣楊王庭萬流芳梅永高把總魯典魯宗周趙光遠陳自興馬負圖鋒營中軍守備劉夢鯤中哨千總解文學把總趙希貴守備張進忠江奇華前右營中軍党威三哨守備張登朝李遇春郭永壽守備武大定甘營守備葛士英千總劉建勳當先勇戰擒斬功多內李毓椿明臣馬負圖党威李遇春郭永壽武大定前以澄城捷功各加一級楊王庭魯典魯宗周陳自興前以

敵坤正氣集

卷四頁五

四

澄城捷功已敘紀錄今請併前功各加一級萬流芳梅永高趙光遠張登朝劉夢鯤解文學趙希貴張進忠江奇華葛士英劉建勳俱請量陞一級馬蘭把總陳我志收降宣力應與塘撥百戶王明德并敘分巡關內監軍道僉事王文清前以黃龍山捷功優敘因誤傳賊信今應停其議敘叅謀原任知州雷鳴時隨營畫策多合機宜經前撫臣糾叅節經督按諸臣審明部覆奉旨降調澄城功已經敘錄在案今請復還原職管三水縣事西安府同知孔宏燮自兵屯該縣措辦糧芻無誤且所練鄉勇隨兵協勦又多馘斬之功請與優敘統領鄉兵守備陳登盈等請給加銜部劄布政司經歷劉文濟隨營管餉輓運收支各數明晰前敘澄城捷功未經列名昨於寇渠投撫疏中補敘今請前後一併優敘以上有功文武各官仍俟寇平日照部頒新例彙題分別再議其應給功賞銀兩

臣先勦餉銀墊給俟部發大賞到日還項臣草疏已畢頃據長武縣報十九日有賊千餘騎自本縣東北地方來至城北將欲割營仍復散往西南去訖是晚三更有過天星下驪隊四虎及六隊郭應聘等男婦三百餘名口復回城下乞降又據鳳翔府報稱有過天星下頭目王永吉等七人率領男婦一百一十四名業赴府投降各等因據此則知賊勢瓦解過天星之黨存者亦實無幾除臣已行該府縣點查解驗審明一體遣散安插外統祈聖明敕部施行爲此謹題崇禎十一年五月二十六日具題六月十四日奉旨這勦降各股大寇允稱奇捷孫傳庭具見方畧勤勞並有功各官俱先行敘陞仍俟寇平彙敘應賞者准勦餉銀軍前立賞該部作速解補敗遁者乘勝盡殲已降者務安插得所該部知道

